

白鶴山房詩鈔

敘一

詩必宗唐唐詩之可尙在雅馴含蓄後世能嗣響者惟有明代顧自錢東澗之論出而李何王李之詩舉世皆祗覆之以竹垞之知詩新城嘗寓書勸其平反二李竹垞不從也歸愚氏持擇雖正然別裁所登隘不足以張諸子之幟自隨園派出明詩愈無問津者惟桐城劉海峯姚姬傳暨吾家海門三先生論詩必以唐明二代爲標準吾歛澹泉吳先生得詩法於海峯桂星久從之遊知其說之不可易然述以語人人輒目笑之惟桐城王姓園灼朱歌堂雅同里吳鶴舫焜持論與予同嗟乎習俗之移人而瑰才卓識之不多邁有如是夫歸安葉君仁甫以翰林觀察清河余耳其詩名久矣一日出白鶴山房詩見示春容和雅大率皆唐音也余已灑然異氣讀至仿遺山論詩絕句崇李

何之正軌黜虞山之邪說不覺躍起三百以爲吾四十年同調  
得君而四矣乃知正聲不絕於天壤必有人出而振之余益喜  
其德之不孤而用以自壯微特爲李何諸子幸實深爲詩教幸  
也觀察督余敘遂書此爲贈時  
嘉慶庚辰夏孟欽鮑桂星拜敘

敘二

余友葉仁甫工爲詩余於壬申歲旣嘗敘其少作矣時仁甫詩固未盡刊也及官清河道擢都轉乃次第付諸梓而屬余復爲之敘蓋仁甫與余同以戊子生同舉京兆同成進士官翰林二十餘年以文字相切劘雖中間官異地不少間其意氣之合不獨以婚姻之誼也今之屬以序者蓋欲余言其所得余少雖好爲詩然實未有所得雖與仁甫唱和嘗自媿其工弗如也茲何足以言仁甫乎然世之知余者往往先稱其詩余嘗笑名之所在非實之所在世事固類有然也夫古人以詩言志而不必存其名今人以詩成名而固可以考其志詩三百篇自周公召公衛武公尹吉甫外其餘感歎傷喟之作大抵皆人之代言非必其所自爲顧欲考其作者之名氏類不可得古人之不重名也

如是今人之於文辭其所業也有志者又往往因文以見道故自宋以來凡以集垂世者其人之志行存其中其一時之典章政令亦見於其中然則舍虛車之飾而以核考業之功夫論詩者豈非以友輔仁之一事哉仁甫官中外皆勤於其職業而志嘗奮然有所爲其爲都轉也矚然自處而欲振刷衰敝俾

國家實受府海之益其他日名位所至後之論詩者宜可隨時以考其志也余昔所作序斤斤致辨於格調間以明仁甫所得踰於流俗者不足以盡仁甫矣

道光二年歲在壬午秋九月新城陳用光敘

敘三

余少侍先大父學爲詩問當世士大夫工於詩者亟稱先生歲壬午初夏謁先生於津門官署薄游洛下重聲價於符融解誦郊居獲賞心於沈約示以白鶴山房詩十二卷命申嘉敘之竊惟先生挺秀浙西傳家通德生稟奇慧能讀異書以博聞彊識爲務以尊師取友爲急由是淩水經生任城逸士史才如班馬詞翰如淵雲得先生一詩靡不翕然稱許愧謝弗及重以承誥鯉庭取資雁列羊徽之兄少有重名王筠之家人各有集和平觀感抑又深已溯自先生供職翰林纂脩

國史侍宴長楊之道珥筆承明之宮維時應奉之作發雕龍於綈縠也則且握手金門之彥聯襍蘭臺之英相與含宮咀商逞才角辨應劉公讌之什鮑謝酬答之篇日月旣多時有所積及

乎視學閩海觀察清河從軍澶淵權權津淀積數十年之久雖  
復官書填委車馬倥傯未嘗一日廢詩如鰈斯隨如鸛斯比宜  
乎詩之工而且富也適客有過余者謂余曰先生之詩卓矣第  
以今之工詩者未易更僕數爭將頡頏作者之室詠歌先王之  
風亦有勝於是詩者乎余曰今之爲詩者其失有八而先生無  
一焉其或鑠於外用窳於內含懸磬之室設食太牢環堵之宮  
巍崇廣殿時無寶貺飾美莖毳籠非枝輔希耀茅箱江淹花管  
忽告盡於奇才李陵空卷終見阨於强敵此一失也先生年逾  
服官猶下董生之帷仕至監司尙發蘇季之篋以是文章之美  
無非經籍之腴又或騁力長肥不事繩尺買菜求益市瓜取大  
泛跡弛千里之駕恐傷於顛仆積紅腐千石之粟無補於朝飢  
是以然膏十鎊不及一星之明擁絮數重不及一裘之暖此一

失也先生緒清藻密氣暇詞整悉合度於脩短曾無貴乎浮冗  
亦有孔珪好奇朱育尙怪文奇於六合氣偏於五行臙疏一角  
終非獸瑞鵠鵠三首是爲鳥妖廣眉半額則施旦爲媼一臂如  
股則扁倉失色此一失也先生敷寫景物不尙詭異懸夷則之  
鏡而鬼神避席吹黍谷之律而祥和畢呈又有恥隨畦町獨闢  
塗徑掉臂藕絲之孔截腸蠻觸之角鳥道九折比於康莊奎蹶  
一涔自謂安室究之尋樅倏墜綠枕易傾曲珠見虺蜉之巧偏  
師非鵝鸛之陣此一失也先生直舒性情不趨險奧如見桓榮  
之安車駟馬叔子之緩帶輕裘焉他如齟齬瑣言戾岡隱語艱  
於索解失在噉駁宋王好色陶令閑情暱語勿莊失在狎褻遇  
非靈均狂歌可哂才慙賈誼痛哭不情是慕古不度時之失也  
效西子之顰學邯鄲之步虎賁有形貌之似芻靈無知覺之運



是泥古不變通之失也先生真積力久洗伐殆盡故能絕塵績藻之府雄視風雅之場質之往哲而無疑傳之千秋而無憾凡此者皆先大父平昔舉以詔嘉而卽先大父所以亟稱先生者也客曰聞吾子言亦知先生之詩之工顧或以先生之詩以唐爲宗而微入於宋其說信乎余曰昔歐冶之造劍也采赤堇之錫出若耶之銅其成也不復能辨其錫與銅也公輸之刻鳳也見其身者謂之龍鵠見其首者謂之鵠鷖而不知翠冠朱距非擬議之可及也先生之詩自三百篇以迄我

朝資之深而學之博不拘拘於一格沾沾於一家獨成其爲先生之詩亦猶歐冶鎔金於一器公輸集巧於一禽奚必唐宋亦何必不唐宋哉縱目覆幬之大始足以論韶揚舠漾瀚之流迺足以測海客曰微子言無以開鄙人之惑願終身事之客旣退

敬書所論列者跋於先生詩集之後  
道光二年季秋之月陽湖趙申嘉謹敘

敘四

筠潭先生與余同歲舉於鄉同官京朝同受知於王述庵翁覃谿兩先生故論詩尤相契合今刻其集徵序於余不能辭也君生於浙浙之詩人

國朝爲最盛朱竹垞精於考據而隸事典切出以渾成故能奄有衆妙鬱爲大家查初白以警透勝厲樊榭以幽峭勝杭堇浦以博麗勝吳穀人以明秀勝其老而健在者惟馬秋藥翁更以俊逸擅場名家林立美不勝收而君書來乃盛推吾鄉廬陵半山盱江道園清江諸公奉以瓣香此其所以克集其鄉先生之長不爲所囿以繼竹垞無多讓焉且君少承尊甫年丈聞泚先生家學又服母太夫人之教含咀英華沉酣圖史遂與其兄琴柯前輩迴翔詞苑累典文衡琴柯旣以奏行保甲上受

仁宗皇帝特達之知簡任藩撫著績封圻君復出持繡斧按部  
行軍積其勲資游登崇秩專司轉運爲

國理財可謂盛矣然君處脂膏之地飲水自甘猶懼綜核未詳  
征輸難繼舊年河堤秋潰巨浸稽天避災之民棲泊於女牆者  
幾及萬人顛沛流離嗷嗷待哺君爲籌款煮賑徧給寒衣晝夜  
焦勞心力畢瘁故其詩沉鬱頓挫惻怛纏綿尤與杜少陵元道  
州爲近視前之絕艷驚才清思逸氣風格一變造詣益深嗚呼  
至矣余年旣就衰心枯才盡比得奇疾瀕於死者八九幸而獲  
甦行將掛冠以去移居於九里洲梅花最深處課子讀書以慰  
遲暮願君益行其志當令澤被海內績茂中朝載調朱絃以協  
雅頌余且附茲集以傳不朽俾千載以下如見余兩人高吟拊  
筇生氣長存豈非藝林之快事也與

道光四年五月中澣年姻愚弟蘭雪吳嵩梁書於京師

白鶴山房詩鈔自敘

余幼承先大夫訓學爲詩先大夫授以漢魏六朝及唐宋元明諸大家名家詩口講指畫一以雄深雅健爲宗不事險怪綺靡小子謹志之勿敢忘泊長而僑寓東吳獲從西莊竹汀述庵諸先生游三先生者言詩皆與先大夫合自是積有所作固未敢以問世也暨官翰林提舉閩南學校諸生知余好言詩則皆求觀余詩以爲程式於是稍取舊藁刪削擇其完善者剗剗之以與諸生相切劘迨辛未春還

朝修史之暇與同館諸君子結詩社酬唱之作尤夥而蘇齋老人每見必索詩自癸酉從戎魏博飛書草檄無少休旋銜

命分巡燕趙兼權藩臬事百重堆案不復親吟詠矣辛巳秋蒙恩司嵯於津職事稍閒視篋衍中手藁累數百紙慮其散佚乃

復編次前後諸作都爲一集明知折楊皇荂無當大雅而當年所受之庭訓及聞之諸先生者點勘之跡猶存不敢付之泯沒且數十年蹤跡所閱歷山川雲物人事合離之概具見於詩雪泥鴻爪亦聊以資考信云時

道光二年歲在元默敦牂九月旣望筠潭居士葉紹本自識於長蘆離署之小玲瓏山館

白鶴山房詩鈔題詞

嘉定錢大昕

石林家世總能詩喜見翩翩玉樹枝  
秀水鹽官前輩盡風流會有代興時

幾度秋風落木初好詩太息抱山居  
客兒自信能成佛一霎升天莫羨渠

海寧祝德麟

競爽名俱美甥乎張一軍經從韋幔授  
詩自鯉庭聞緒業原非淺才華迴軼羣  
前賢不可作片席許人分

追風神驥力蔽日豫章材袖裏一編出  
蒼然萬象來王維謂夢樓既宏獎錢起竹亦交推虎帥  
誰能犯繁枝自剪裁

德清蔡之定



白鶴山房集卷之四  
椿樹參差繞院深  
好風吹送北窗陰  
攜將白鶴山房集  
清簟疎簾細細吟

名父賢兄世共知  
君材況是出藍姿  
石渠閣畔持椽筆  
更注金壺洩藻思

長白英和

白板扉前一棹開  
烟波漁釣影徘徊  
吳淞雲樹茗溪月  
都入生花筆底來

幽并延攬甲科登  
屢變詩臻最上乘  
我學書還與君異  
一生低首趙吳興

閩嶠輜軒許采風  
文昌光氣亘如虹  
須知碧海鯨魚句  
尙在樊南乙集中

武進趙懷玉

壻鄉風月費評衡  
老雪詩人得氣清  
莫道文章憎命達  
才名原不礙科名

兩重同譜十年思

余與兩哲兄君與族弟任之先後齊年

別太恩恩見太遲  
我倦

趨塵君發軔幾時  
剪燭更論詩

東鄉吳嵩梁

萬古靈山險鑿開  
雲根裂處有風雷  
怪君詩骨凌秋健  
曾到黃龍洞裏來

瀑布千尋化白虹  
蓮花絕頂與天通  
煙雲變滅無窮妙  
只在清空世界中

吳山積翠浙江潮  
落筆千山與動搖  
卻愛東莊谿谿夢  
冷青楓樹下水平橋

露華如雨樹成煙  
萬頃蘆花一釣船  
驚脰湖邊佳句出  
舊游根

觸十三年

用集中題東坡集後韻

臨汾郭汝驄

五嶽羅胸起鬱拔龍威奇字識來多髯蘇又譜江東去應配銅絃鐵板歌

大筆如椽縱復橫奇花都向夢中生他年壇坫誰堪繼好把顏回一鑄成

卿月當空玉鏡懸文光四射衆星躔從知浣手銀河裏倒峽詞源灌百川

題辭

讀白鶴山房詩鈔即集句敬題

受業世愚姪荆蔚

閉齋題品溯吳興古意新裁得未曾白鶴尾翹仙骨瘦霞衣雲表看飛昇

九重深沐

露蕭零三晉雲山接翠陁却憶甘棠遺澤在春風

猶潤綠莎廳

光祿公備兵河東行保甲水利至今遺愛不忘

淹中已致徐生學古易難尋輔嗣論今日虛堂崇像設文章忠

孝識清門

光祿公培植河中書院極一時人材之盛又著易守一書發揮精粹蒲人已請崇祀各宦

肯使雕蟲過一生優游敷政頌廉平華榮棣鄂家聲遠

謂渠柯夫子

大國珠盤屬主盟

正聲獨奏樂鈞天雋味宜參玉液泉我愧侯芭曾問字

嘉慶己未蔣以

詩賦就正蘋香空采晉祠邊

渠柯夫子

白鶴山房詩鈔目錄

歸安葉紹本仁甫

卷一

古今體詩六十三首

卷二

古今體詩八十一首

卷三

古今體詩八十首

卷四

古今體詩八十六首

卷五

古今體詩一百三首

卷六

古今體詩五十六首

卷七

古今體詩四十九首

卷八

古今體詩三十六首

卷九

古今體詩一百首

卷十

古今體詩九十四首

卷十一

古今體詩五十九首

卷十二

古今體詩七十三首

卷十三

古今體詩八十首

卷十四

古今體詩六十一首

卷十五

古今體詩九十六首

卷十六

古今體詩八十八首

卷十七

古今體詩六十七首

卷十八

古今體詩四十二首

卷十九

古今體詩八十九首

卷二十

古今體詩九十三首



白鶴山房詩鈔卷一

歸安葉紹本仁甫

古今體詩六十三首

津門道中

恒衛經流注海門析津上應指天根萬家燈火蒲魚市千頃陂  
塘稻蟹村隱岸牙檣新粟漕連營鐵甲舊軍屯神都左輔稱雄  
勝快我輕橈破浪渾

衛河

晴波流向北征棹故逶遲岸遠識潮落帆迴疑樹移白沙堤上  
路翠柏水邊祠秋意寒原盡蒼茫畫角悲

臨清道中九日

千里清渠一線通行人解纜背霜風嶧山岱野幾層碧柿葉棗

白鶴山房詩集卷一  
林相映紅堤作弓形迴上下帆飛之字誤西東客中辜負茱萸  
節魯酒憑燒塊磊空

放牖歌

汶之水出萊山中汭流一脈懸晴虹建瓴高屋勢莫遏奔駛直  
與清淮通一從轉粟漕河洪引渠置牖勤考工涼秋雨霽潢潦  
集上流趨注歸清潔水門當前陡截斷有若持勁彎强弓連朝  
全湧勢逾怒一瀉遂欲穿礮袂雪濤爭起凌寒空翻然尺水生  
窟窿猛士突圍死戰決銀矛雪刃紛交鋒百萬鐵騎來奔驟聲  
琤琮砰訇天鼓喧鈴火馳豐隆囂吟鯨吼怒相軋歛忽鼎沸天  
吳宮盤渦勢更坼地底飛流濺沫噴玲瓏九龍爭擲萬斛珠雪  
海騰湧翻陰風我昔登龍門赤鯉躍出波喧洶我昔經匡廬玉  
峽擘破飛白龍不圖平地乃有此激行搏躍爭天功自來濟州

已半月日日候牖眠烏篷忽聞邪許聲如鳥插羽離筴籠舟師  
亦貪利涉速掉舞一葉如飛蓬乘風破浪亦何畏稍喜快意捐  
煩忡是時霜氣吹丹楓蘆花兩岸號征鴻維舟戛就斷岸宿沙  
頭津鼓猶鼕鼕笑呼一醉村酒紅忽然飛夢錢江東海門羅刹  
潮頭雄江妃宓女顧我笑素車白馬紛馳從醒來但覺乾端坤  
倪蕩涵生心胸

清口謁惠濟祠

雲濤浩渺峙琳宮終古安流奠海東碧殿罕恩明曉日翠帷環  
珮護靈風清都玉女畱奇並赤水瑤姬佐治同向晚傳芭簫鼓  
散檣烏飛繞落霞紅

泛舟出城北

雨餘天影暎湖明如鏡澄波打槳輕雜樹低藏數家小亂雲時

放一峰晴燕過春社齊營壘人對滄浪欲濯纓回首塵襟應盡浣  
煙江吾已諾鷗盟

法華寺用東坡韻

青山突起玻璃界東走層崖疊千派忽驚古剎瞰蒼茫縱目煙霞恣酣快披榛迂折見幽徑夾道松風奏砢砢澗泉曲屈注庭宇石磴峻嶒窮險隘危樓際天白雲抱斷碑臥地蒼苔壞穿巖老樹漸欲青格磔時來山鳥怪雲深谷暗不知暮惟見丹岑殘日曬道人掃徑出迎客爲汲溪流煮葵薤穆然相對太古顏齒冷人間鬪機械好山如此可終隱何苦浮榮著膚疥羨殺歸途兩樵叟谿藤刷盡閒長鍛幾時便與結茅庵一了此生登覽債

梅花

凍蛟蟠屈榦槎枒萬古霜中自作花數點默窺天地始半林長

傍雪雲斜蟾輝孤映笛三弄鶴夢同清水一涯聞道溪西看最  
勝拏舟試拗玉丫叉

荅溪曉發

拏音下晴川春氣正晝藹流雲澹前渚朝暎半明晦層瀾迤邐  
來和風與之會縠紋碎琉璃綠淨不可繪谿迴櫂容與洲轉帆  
向背極望蒼翠齊草樹鬱煙靄人與鷗鷺侶興出蒼茫外流覽  
愜素心浩歌激清籟甫里風豈遙谷口境宛在何當腰笭簞共  
斫銀絲鱸

得二兄蜀中書卻寄

灩澦濤穿石壁虛感君巫峽挂帆初清江十月哀猿淚孤棹三  
巴故國書入蜀杜陵多嘯咏離家王粲少恒居遙知吟到蓬婆  
雪還向飛雲憶舊廬

吳中懷古

採藥遺封轉富強  
天教霸氣盛東方  
水犀初解三千甲  
彩鷁旋牽百萬檣  
終古寒流怨鳥喙  
當年飛血灑魚腸  
宮牆幻夢須臾事  
淒絕麋城蔓草荒

剖玉東邊跡已陳  
故宮猶說舊春申  
棘門此日難危楚  
雍時當年竟滅秦  
珠履蹤迷芳草路  
細腰歌剩繞梁塵  
干戈羅綺銷沈盡  
空有遺祠賽里人

定錯城蕪舊賜藩  
青宮博局竟成冤  
銅山未賜江淮賦  
玉几依然帶礪尊  
粟腐海陵飛白羽  
花濃茂苑冷金樽  
尺衣斗米千秋恨  
太息枚生再上言

長沙奮翮著純忠  
弱冠提師計要雄  
一旅志猶尊闕北  
三分業已創江東  
橫戈天塹元無敵  
奉朔當塗負乃公  
一代豪雄總塵

土荒陵自嘯白楊風

桓王墓在盤門外

淮西三矢定吳鄉御酒龍衣事渺茫霸業已枯黃  
菜葉雄名曾記白駒場十年胥浦戈船接一夜瓊樓劫火忙  
試問興亡尋月表千秋還愧夥頤王

師子林

名園緬仙蹤奇構闢禪界翛然闔闔中乃具林壑概入門無平地仄徑走紆怪危巒起咫尺千壘成一簣礪斷嶺忽遙岫轉亭已在複道磴盤迴石窟路向背突兀聳九華奧竅藏八卦連峯七十二一一峙嶮崿仇池非人間武夷疑世外緣壁迷後途穿壑阻前隘其石水榭接石梁亘長帶游魚紛可數荇藻淨如繪層欄架中沚碧沼漾清派上有千載松裂根石罅內霜皮溜秋雨輕濤激鳴籟翠嶼復林立皴綠生古黛應接人力疲刻畫鬼

工快異哉高士跡天巧恣點綴想其經營時萬象方寸會邇來  
幾廢興攀躋盛流輩蒼苔破裙屨蘿薛接冠蓋寥寥千載心此  
意付煙靄買山願未能覽古一興慨且佳亦復佳竹風靜梵隕

吳江舟中

江城新雨後夾岸野風涼亂澗流春水孤帆下夕陽拂堤紅杏  
豔倚棹紫蘋香遙識松陵路虹橋故故長

唐氏園看牡丹

茂苑鶯啼春欲暮春風一夜城東路名花故向雨餘開不放春  
風竟歸去主人愛花更好客邀我看花置芳醑珠屏斜展錦障  
開照眼花光亂花霧亭亭絳藥暈初日的檀心泣朝露曉妝  
有淚紫綃溼柘枝無力猩裙妬國香酣酒自多態豔影臨風剛  
一顧五家隊合簇紅裳記得曲江冶游處心驚絕豔目屢拭喚



起春愁渺無緒自來尤物不易覲竟使坐環千姪姹藏將金屋  
洵有情顏我玉山容且佳君不見宜春門外平章家紫雲金縷  
爭豪奢香車繡轂竟何往雕闌百寶今泥沙豈如此花媚幽獨  
櫺檻處處烘晴霞銀樽彩筆賞未厭眼前富貴寧須誇况有主  
人堪作主捲簾勝事今重舉一卮好爲酹花王願把新詩當羯  
鼓

唐昭宗賜錢武肅王鐵券歌

君不見黃腰獸入金光門紛紛列鎮猶蜂屯石鑑山前起妖鳥  
櫓檣東指風煙昏婆留井沸異人出一舉雙戈靖吳越弩強不  
畏子胥潮擾擾董劉何足滅衣錦歸來十四州湖山故里旌旗  
遊英名直到含元殿夜夜虹光徹斗牛長安天子驚笳鼓金版  
丹書下旁午可憐勳爵苦羈縻枉比燕然五熟釜異姓王真蓋

世雄虎符龍節鎮江東開門節度計非左還以奇智成精忠五  
王四世承恩重六十年終歸大宋玉冊曾誇海上樓圖書還入  
瓊林貢臨安興廢幾雲煙金字還從漁網傳卻笑韓彭盡菹醢  
刻版倣古徒紛然明祖賜功臣券取此爲式我讀遺文心轉惻遐憶煌煌太  
宗業凌煙諸將在朝廷帶礪金湯永無缺豈料黃塵遍四溟天  
章倉卒來鋒鏑吁嗟乎岐王已去梁王來紇干東雀飛難回長  
安九鼎委榛莽不如此券猶保錢江隈鐵券亦有銅駝哀

鶯脰湖

霽雨洗華雲湖光淨練紋暮天遙岫隱秋水亂帆分已醉松陵  
酒猶看弁嶺雲浮家吾有約羨爾白鷗羣

吳江城外

艇子嘔啞日未午楓林葉落碧煙平溼雲過樹不成雨溪水放

田時有聲疎竹陰邊開野寺寒蘆盡處見江城鴟夷舊迹今何在湖上青螺幾點橫

中秋見月放歌時在吳中

今年遇閏秋節早中秋未過涼風高天公欲洗明鏡出先期風雨清煩囂今宵冰輪出較晚初時雲涌猶崩濤須臾一掃積靄散寒光噴射千白毫玉露無聲桂華冷珠箔浮動金波搖炯然一鑑直無際那論瓊島分衡茅太清沈沈渺何許下視人海方喧嘈我來吳中已一月金觥不住塊磊澆一杯邀月共痛飲酒酣決眼還蕭騷十年此夕七易地浮生擾擾真徒勞白衣蒼狗幾明滅搶榆運海空相嘲人世哀樂百事變惟有明月仍今宵乃知古人重炳燭眼前光景慎勿拋移山逐日竟何謂大塊視爾如螭螭况復繁華盛吳會闔閭舊俗餘矜驕珠簾千家晃銀

燭畫船十里鳴瓊簫麋遊虎踞總莫問且辨雙耳聽琅璈伸眉  
一笑亦非易舉首枉向青天搔乘風會跨海上鯨得意且盡盃  
中醪浩歌欲起夜過半銀漢石界雞三號

九日吳中漫興二首

商聲已老物華催令節惟應笑口開吳地水寒楓盡落江天霜  
冷雁初來何人解破牛山涕有酒須傾彭澤杯莫倚高樓窮遠  
目沈寥時序易生哀

蘭蕙初薺水榭虛一編寂寂子雲居地能遠俗花都瘦詩解消  
愁酒不如木杪驚颺遊子恨燈前涼雨故人疎年來幾負題糕  
約獨惜流光晚歲餘

楓橋東朱蔬坪太史 鈐

吳江霜冷泛疎蓬爲訪茗西玉局翁隱几公方注秋水開軒人

似坐春風寒山鐘斷楓千樹老圓香濃菊一叢回首舊遊清興  
在畫船燈火月明中

先生灑落真前輩畱客還烹顧渚茶瀛島春深頻入夢湖山勝  
處盡爲家尊前揮麈情如昨浦口歸鴻興正賒惆悵暮帆催客  
別紛紛黃葉又天涯

登報恩寺塔

高標雄建斗杓旁佳日登臨俯大荒千里山川同漠漠一身湖  
海正茫茫晴空樹色連江表終古鈴聲語夕陽我欲臨風呵畫  
壁排雲直恐近天閭

寄題許竹嶼夫子瑤臺清曉圖和大兄琴柯韻

夢中有夢何從說誰向紅塵聳身出十洲三十六瓊都何處藥  
珠宮第一鹽官夫子冰雪顏道骨謾謾松風寒早攀琪樹來銀

關曾看瓊花到上闌青霄已許乘雲至更與人間了塵事萬令  
官爲勾漏砂鄭公姓作兒童字吏術仙才到處聞一朝脫屣緝  
蓉囊池中久貯三華水杖底曾挑五嶽雲解組歸來凡幾載游  
蹤仍復耽湖海架廟還聞介叟留忘年恰值禰衡在把臂重將  
舊話傳白頭逸興尙翩翩壁間忽現華嚴界卷裏新開內景篇  
爲言學道無功績此身原是壺中客石枕非炊旅肆梁王京曾  
化尙書寫紫闕迢迢三萬重珠屏十二敞天風翠環並坐青腰  
女絳節爭迎綠髮翁從茲屢駐雲中旆丹邱知有三生債栩栩  
誰明弔詭緣元元豈礙觀空戒一笑相看九百年索將真面應  
茫然聊憑藝苑添毫筆認取神州住世仙憶昔從公河上浦風  
和絳帳沾春雨緱嶺都慙鶴骨輕浮邱舊識方瞳古幾載離思  
湘水清近傳消息轉心驚萍浮滄海原多幻花落江城倍愴情

搏沙人事拋還散神明誰似先  
生健壽錄重繙雲笈文冰廚應  
飫胡麻飯仙謠賡罷起長思願  
結青鞵俟異時請歌角里紫芝  
曲聊當雲華碧落詞

寄二兄紫畦下南宮第作

人生擾擾黑虬蜉眼前得失何時休  
况復浮名競鬪觸欲捕風影茫無  
由吾兄早年百夫特矯如俊鶻摩  
清秋凌雲一賦動京洛意氣獨出  
無朋儔公卿爭來訊名字落筆往  
往蟠螭叫謂當奮翅九萬里玉霄  
瀛島供遨遊何圖此志屢顛蹶黑  
貂敝盡蘇卿裘自從扁舟返鄉井  
五湖鮭菜誰爲謀綈袍不改舊范  
叔斗粟誰貸監河侯兄家居屢值歲歉  
前年別我意悽惻翩然忽作岷峩  
遊青蛉關高走夷獠黑江水險通  
鼉牛連峯障天雪相映君乃磊落  
驅行軼丈夫自有四方志所嗟衣  
食因人籌今年忽聞單舸

返出門驚看淚兩眸爲言捧檄腸已斷但恨素願難爲酬來朝  
解纜竟北去揮手不作平原畱崎嶇何必非天意鹽車要待孫  
陽收豈知宋五又坦率選刷天駟遺驊驪知君著論久齊物詎  
因時命生煩惱獼猴乞兒各無定一笑身世真悠悠嗟余頻年  
困猿臂三拜還爲方干羞邇來浮慮已盡屏祇有蠹冊容爬搜  
紫薇先生亦寂寞謂琴柯兄緇帷冷落東海頭分來苜蓿不自飽苦  
說賤疏窮匡劉幼輿邱壑故無恙便從路水迴輕舟溪頭一竿  
是處好還往歸來正值白蘋花發清波流

七夕

暑雨纔收夕露零獨橫湘簾展銀屏高樓靜入閨人月銀渚寒  
明帝子星遙夜疎砧聞別院微涼落葉在空庭近來身世常安  
拙不用瓜盤更乞靈



沈寥景物最銷魂  
寂寞江關賦小園  
靈鵲如人棲未穩  
候蟲無怨語  
偏繁閒情漫譜  
龍脣奏狂態  
空餘犢鼻褌  
欲向浮槎問消息  
幾時清淺認河源

虎邱燈船行

闔閭城西秋月圓  
雲巖寺北秋波連  
碧天萬里洗明鏡  
寒光映徹玻璃煙  
吳儂好事誇豪舉  
畫舫參差盛三五  
要將華焰鬪金波  
珠箔銀缸日重午  
未晡雲屏翠幕張  
螭頭鷁首爭徜徉  
須臾滿眼耀銀海  
晶毬萬點鋪橫塘  
一色瓊瑤迷兩岸  
月影波光爭激灩  
九華燭轉玉繩低  
百子枝連火樹燦  
恍忽驪龍亦吐珠  
水晶世界浸蓬壺  
瑤池水暖浮銀闕  
星海波明種白榆  
璧月瑤花映更好  
霓裳小隊笙歌繞  
一聲水調紫霞飛  
十里珠簾香霧裊  
天河影轉月橫參  
翠管金疊直到明  
短簿祠前人影亂  
真娘冢

畔桂香清綺羅自昔稱吳會千古遺風猶不改空傳劍氣溢秋  
塘惟見芳塵凝暮靄幾日胥江長夜潮越來溪畔更停橈澄湖  
萬頃天如水看駕冰輪上玉霄

吳俗以十八日泛月  
石湖燈船尤甚云

和家仲兄自都旋里追和琴柯兄贈行之作

蕭瑟秋光稟此辰解衣且拂舊緇塵休論旅跡三千里已自蹉  
跎十二春同調半非披褐侶故山原是荷鋤人長安車馬如流  
水無地能容嘯傲身

莫問談經心事違溪山新製薜蘿衣饑寒驅我貧非病歲月欺  
人去豈歸行卷好畱花樣古挑燈重訝鬢毛稀由來飯顆吟多  
瘦相者何因更舉肥

喜二兄自都中歸用去秋柬大兄韻

把臂潛然語夜分石畱那復解耕耘最憐朔雪催歸棹恰喜溪

堂共夕矚南北一身人似雁江湖十載事如雲京華歷歷前游在惆悵挑燈話昔聞

年華過去等風煙歛見霜林似火然白眼天涯猶故我青天蜀

道又殘年

兄歲前將之蜀

壯遊且贈秦人策絕業誰傳韋相編剩有豪

吟心轉健箭鋒機緊鬪新篇

題錢粟頤姊壻

慎

學圃小照

春雨過平臯陌上一畦綠負耒人出門桑陰移屋角

平望

一水分吳越蒼茫遠望餘朱闌通略約碧樹隱邨墟江市千艘米湖船二寸魚誰能謝塵事卜築此幽居

送二兄之順慶

男兒志四方弧矢利行役一爲名利驅榮悴亦殊轍吾兄豪雋

白鶴山房詩集卷一  
十一  
姿天驥不受策自從應弓旌出處轉遍仄燕齊及晉楚所至不  
暖席謂當何年歸深林息飛翮誰知溪山間不著勞人迹岷峨  
幾還往瘴嶺輕奔涉空存塊磊胸瘦盡崢嶸骨今君又當往臨  
別心轉蠹車輪本無角牛磨安得歇蕭然理行橐萬里逐估客  
且復隨人歡歌呼達晨夕一邱幸自足浮名竟何益解維君莫  
急小住抵雙壁

前年送君行風雨吳門秋今年送君行綠草彌汀洲君行何時  
止歲月忽已邁憶君初別吾實爲菽水謀囑吾各努力庶幾潔  
珍羞相期數年來素願或可酬胡爲事竟違風木奄不畱吾亦  
何所成荆璞誰見收相逢一悲咽何以慰松楸君又不少安挈  
舟出黃牛郵程雖云熟波濤暗西州殊方異寒暄莫費百結裘  
郵筒有官醢聊以澆百憂綈袍稍得溫牛衣且歸休明年蘋花

生共作清溪遊

滄浪亭

高亭面蒼陂積水在其趾翛然林莽間空翠來不已入門苔逕滑疎籬撻六枳長人挂健松玉頰豔苦李鴨闌及魚檻一一位置美翼上東南峰聳然一簣耳怪石來湖龜突兀疊嶂起頗愛修竹林碧影映窗几想見六月涼風露浩如洗別蘚尋螭蛺蝶高懷緬長史挂冠神武後息影乃於此寤歌真自適窮愁未應恥吾亦澹蕩人暇則蠟屐齒便思持釣竿濯纓此溪水落日聞疎鐘浩然吾歸矣

春日旅懷

水煖平江北雁鶩飛來蝴蝶又南園雨餘碧蘚侵籬腳水長青蒲出柳根檻外雜花三婦豔隄邊深樹五禽言支頤宴坐渾無

事日擁塵編不出門

久雨短述

伏雨闌風鎮日過小園春事竟蹉跎  
病花欲覓千金獺密樹新  
頌五斛螺載酒客頻妨蠟屐衝煙  
人祇負漁簑丙丁擬寫祈晴  
帖鳩語空林奈爾何

東禪寺

閒攜勝侶款禪扉雨後新涼透袷衣  
門外綠陰啼鳥歇籬邊紅  
豆舊人非苔龕畫掩鐘聲靜竹逕  
深圍佛火微欲向瞿曇問塵  
劫赤烏年代已依稀

寺建于吳赤烏年

返里道中

百里郵籤報水程鷺湖波接碧湖清  
渡頭風急雨花溼樹裏日  
穿雲脚明道暑欲陳符六癸辭家早  
換候三庚權郎認得前溪

路一道荷香直到城

立秋

一葉墜梧楸天涯颯已秋西風團扇怨明月藁砧愁代謝歲時  
速永懷湖海游趨炎寧耐久蠅蚋爾何求

七夕

纖月西南上微雲河漢沈雙星兒女意獨客歲時心應候聞秋  
蟀驚寒有露禽茶瓜容小飲移席碧桐陰

短歌行

置酒高臺明星在天拔劍四顧我心茫然解一悲風自西吹彼落  
葉今我不樂來者白髮解二神鷹夢澤三年不飛翮彼斥鷃嬉游  
一枝解三曹蜍李志生若泉下持籌鑽核彼何爲者解四浮雲從風  
舒卷青冥我視富貴若朝露零解五金馬華裳九秋之夕僕于此

時能飲一石六解人生歛穢不必羊腸男兒得意不必侯王七解酌  
君卮酒壽君千齡盛年無常努力令名八解

獨漉篇

獨漉獨漉水深泥濁蛟龍有珠在潛淵我欲攫之不可得耶谿  
雙鉤流光白虹風胡不世出入水化爲龍太行鹽車騷耳悲鳴  
得君一顧致君崑崙天有四時可以迭代人無百身何以千載  
黃鵠矯翼將凌天衢徘徊萬里肯顧雞臆望天蒼蒼涉水茫茫  
獨立千古我心徬徨

七月十六日遊師林寺作

中吳富梵宇所在崇金繩師林實古剎隔巷鐘聲宏端居困炎  
歊兀如坐炊飯爰偕二三輩步履初地登雙樹覆寺門天矯龍  
蛇騰斜陽晃金碧琳宇何危增合掌禮慈皇珠眉髮鬚髯蹊踞



帝釋像黯澹琉璃燈左轉循修廊曲欄宛相扔有髮白氎巾云  
是此寺僧揖我延客入偃僂卑詞承遂造青豆房淨几藤輪凭  
丈室信清涼繡栢重桴櫓小池白芙蕖卷簾清無蠅有竹映經  
廚軒楹翠層層殷勤進綠茗更迭敲元冰復起導我游傑閣窺  
繪綾鐵鳳舞采恩紫鴿翻觚稜循觀目爲恂僧意何驕矜言此  
龍象力昨歲息版紐聚沙成須彌檀施罔弗膺七寶蓮花幢庶  
幾安禪朋余笑不之應嗟彼志良顚追維浮屠法苦行以爲恒  
乞食舍衛城十笏橫雙肱鄙野固其俗虛寂理亦應胡爲入震  
旦木妖祇園興珠網皇居疑丹雘侯門勝金地千由旬妄語以  
實徵朝數姹女錢暮致富兒繪情游蝨其中高座恣詭稱衣食  
固民蠹奢蕩尤宜懲安能冠其顛精廬化溝塍觸目足長吁聊  
借捐鬱蒸夕梵忽已傳霞斂秋天澄拂衣出門去皎月東南升

七月二十三日山雨欲降涼風灑然始有秋意

焚尾暑猶劇冷風快乍披物情變搖落天意與推移羃羃雲封  
逕淒淒葉下帷榮華有衰歇秋士不須悲

聞李大

黼庭

罷官還京

短李風流舊絕倫忽聞投劾謝朝紳樽前竟爲添蛇誤塞上誰  
知失馬因甌破不煩回首看囊空真有在官貧哦松果是詩情  
好還向林泉認此身

六年手版潞河隈簿領原難屈驥才捧檄少卿寧得已折腰元  
亮合歸來忍饑尙有明年麩不嫁非無異日媒未可與君論得  
失豐臺花放且銜杯

吳江道中

吳淞八月江水肥片帆欹側凌斜暉雲陰菰蒲風獵獵日落崖

柳煙霏霏背人白鳥一雙去隔浦烏犍三五歸扣舷濯足儘快  
意局束安可隨韁轡

烏鎮曉發

急樂破殘夢推篷朝日嗽風平喧早渡霧斂見前村野釣寒魚  
小疎林晴鵲翻田家正無事水碓響柴門

舟出震澤

趁曉挈音古渡東寒蘆渺渺接晴空潞河水占三义路來往帆  
爭八尺風舟人帆風有櫓前八尺之諺鳥影平看雲在外人煙遙起樹  
當中十年夢與閒鷗熟何日漁蓑借釣翁

前山漾

吳興清遠區處處水晶窟誰於巨浸間羣峰作界畫玉湖合溪  
流十里水波碧前山當其涯決潏衆流闊峯音及秋曉萬景映

澄澈縠紋因風細鏡面開匳潔何年刻蒼崖鎔此涇銀液錯磨  
遙天青渲漾雲影白浮嵐勢飛動石壁翻窻突一片玻璃煙了  
不隔毫髮渺瀰失汀渚隱約望林樾蒼葭離披去時見孤鷗沒  
吾行趁朝霽空明自擊楫波平與水軟此樂豈殊昔神仙懷桑  
苧舊隱迷泊宅欸乃一聲歌放懷塵界窄

歲暮雜詠

細腰鼓急晚風嚴商陸鑪中子細添纔是玉梅花放後小晴殘  
雪尙棲簷

竹屋松窗與自幽不須惆悵歲華周詩篇束筍書堆几可要聲  
名動五侯

幽居結得遠塵閬剕啄都無到此間忽地開簾蒼靄入城西數  
點夕陽山

山礬萼綻小桃萌。有韶光潑眼迎。劇愛江南春事早。擔花似錦滿江城。

綠浪紅闌一水遙。東風僂指盪蘭橈。香山詩句分明在。元日冰消烏鵲橋。

橘齋花餽鬪豪奢。斑管憑誰紀麗誇。幾度中吳驚節物。殢人歸思又天涯。

除夜守歲作

百年迅風輪已往。無甯駕乘除。起杪忽寸晷。不我借。何待星紀周。始見年運謝。兒童競鼓歌。比戶羅酒炙。似將一餉歡。欲把流光貰。一線豈足矜。此言聊汝詫。吾生已二紀。忽忽如傳舍。已甘鄧禹笑。敢學劉四罵。惟將故我身。歲歲遲暮迓。茲宵輒不寐。嘿嘿行目吒。修蛇已脫鱗。强弩漫持靶。卻思十年來。何者非閒暇。

目前不足珍過去盡無價及辰當行樂莫幸一日蜡明年師古人秉燭遊夜夜

白鶴山房詩鈔卷一

白鶴山房詩鈔卷二

歸安葉紹本仁甫

古今體詩八十一首

得二兄蜀中書卻寄

爲君屈指計關河書到俄驚歲月訛消息半年懸夢寐辛勤一  
紙話風波

書述江  
行甚險

羊腸未必人情似蟲臂真如造物何幾度懷

歸轉畱阻故山猿鶴怨還多

頻年奔走蜀江西  
夔道煙花足感懷負弩未酬司馬志思家空  
對杜鵑啼徘徊歧路心原苦感槩中年事漸睽聞道羽書邊外

急隨身長鋏試提攜

時大兵勦  
廓爾喀

風雨連宵感夢魂心期異地許同論君如倦鳥思棲樹我似羸  
駒困服輶小技最羞工篆刻畸人未合問田園春風只听歸帆

卸日日江頭自候門

偕同人遊師子林憩飲竟日東主人黃秋葭四十韻

地迴名園古居鄰步履通相逢長日暇幽興數人同杖策緣花  
塢攀蘿徑石叢墜崖蹲伏虎危磴跨晴虹岫轉亭如笠巖迴路  
似衙三峯看尺咫九曲誤西東小有仇池穴飛來鷲嶺宮壁根  
侵蘚紫洞口瀉泉紅樹影交簷合雲光映磴空觀魚循曲檻淪  
茗引連筒階響層層水窗虛面面風竹深吹綠霧柏老貫青銅  
境僻秋先到心涼暑漸融折長松作麈卷翠蓋爲筩相對忘曦  
晷翻疑坐釣篷彈棊捎橘刺移席蔭寒櫻文采徵唐勒高談起  
孟公鄱陽欣謔暴峽水鬪辭雄地主矧殊絕當筵挹素衷汪洋  
懷叔度詩律憶涪翁羣彥歡連袂吾生感轉蓬空浮洞庭水頻  
跨太行驄雲夢吞何有泥塗困屢蒙遊梁徒爾爾入洛太匆匆



扇每元規障琴無鍾子聰羸牛仍踏磨逸翮那離籠自返江湖  
棹稍寬歧路忡放情勤蠟屐泛宅快移舸弁嶺鋤春笋茗溪種  
晚菰夢還捐輾輾興只在龍嵒林屋窺金簡丹山遇玉童叱羊  
心尙壯駕鳳志奚從巾屨雖神往邱園枉願豐買山寧有力仰  
屋詎長終何意逢張牧偏教附阿戎肩輿頻往復敝黛許探窮  
奇賞煙霞外神清水石中米顛真欲拜陰賦詎能工觴詠吾儕  
事經營開士功各懷情磊落深惜景朦朧隔寺昏鐘遞侵衣暮  
靄濛衡門相送處新月照疎桐

松江呈祝止堂侍御

先生閒卻鑾坡直來向吳淞聽棹歌萬丈光芒畱彩筆廿年身  
世付漁蓑才名老作湖山主富貴人傳春夢婆千仞鳳翔霄漢  
遍而今穩食五園禾

白鶴山房詩集卷二  
二  
塵中那復覩斯人喜近龍門問道頻  
畫杖試窺重席與題牋欲  
染九峯春江亭閒僂烏皮几野徑時  
欲墊角巾莫漫耽吟坐詩  
瘦願公珍重薜蘿身

婁江道中

冥濛雲水去何之如練澄江放棹遲  
花信漸闌風陣陣春潮欲  
上雨絲絲白蘋香裏聞漁笛綠柳陰  
中認戍旗此到葺城應畱  
滯杜鵑啼後數歸期

渡吳淞江

雨後春流綠潑醅微茫煙樹畫圖開  
峭帆十幅橫江去恰似并  
刀快翦來

菜花和韻

離離如罌接平蕪滿眼韶光秀欲無  
不斷芳塍新屨織依然大

地碎金鋪移將張翰風流句寫入徐熙月令圖正是南鄰春社  
後好攜村酒聽提壺

爛漫青畦露未乾禁煙天氣尙餘寒從教繡壤畱生意可有佳

名號合歡

嶺南有菜四葉相對夜合晝開人呼合歡菜

夾澗水流春漲活杖藜人隔

小橋看南園開處晴光早倚徧高樓百尺欄

點綴南阡北陌中兔葵燕麥共栽栽疎籬寒送桃花雨平野香

來柳葉風柔柘影斜煙欲暝雞豚村接徑纔通上東門外清明

近認取陰陰五畝宮

鶯簧漸囀燕梳翎絕愛郊原短策停深樹盡聞泥滑滑高陵恰

襯麥青青江南二月春如許陌上斜陽路幾經欲息機心師抱

甕東臯新築小茅亭

喜大兄入翰林東寄三首

冬樹落復榮秋草枯翼綠人生遞悲歡迅若車轉轂我兄璠璣  
器磨礱去圭角早年捷京兆蜚聲滿場屋驂駟初驤首閱風佇  
蹠足不謂數年來公車困馳逐蘇卿書十上管子戰三北中復  
厯憂虞煢煢賦菽蓁雖通閭門籍未受太倉粟辛苦事筆耕閱  
貢食少肉楊鱸期必大于駟竟難卜頗復嘆睽孤天道迷剝復  
豈知南溟運終異迴谿伏藥榜一朝懸劉蕡終見錄寒灰遽然  
鑪暖律欬吹谷失喜看泥金姓名翻誤讀

翰林古內相禁苑推清班史館及祕書分職承金鑾編摩與獻  
納厥任皆鉅艱苟免素位譏一長良已難自從有明來三署合  
一官承明執簡記石渠司王言卿雲史筆工遷固經術殫千秋  
著作業健者寧能全况復寵數殊甄拔逮草菅儒生一釋褐卽  
著鷄鵲冠振步上玉清換骨非金丹

國家嚮儒術意比授子餐班序豈不嚴特爲英賢寬士也際盛  
時感激生肺肝勉哉潤

皇猷黼黻同爛斑無詡稽古榮陋彼東海桓

城中好虞袖郊外全匹綺江源初濫觴盛或決濛汜嗟此集賢  
院後學所仰止依景效步趨若脂羣附蟻長楊賦一奏動貴洛  
陽紙苟或尙散駸勢必從風靡剽竊益失真顰眉成齟齬文章  
關世教盛衰豈恒理赤手挽頽波誰作中流砥兄也庭訓承六  
經樹根柢天人三策對健筆邁楊李所希紹前修勿復論俗耳  
書林舉梗栢文罔黜鷲雉庶幾樹準繩斯事有正軌儒官無事  
業食粟蓋已鄙行矣勵丹誠報

恩從此始

謁韋蘇州祠

霽雨澹輕塵落日坦徐步晚晚遙山陰迢遞城隅路言尋韋公  
舊修竹夾古宇返景下苔階微風颯庭樹焚香薦幽茗慨此無  
言趣不覺暮煙深疎鐘起何處

### 焦山古鼎歌

滄江峽束雲濤空海門古寺朝霞紅何年古鼎躍水出寶氣下  
燭驚蛟龍雌敦虎彝已莫辨苔斑知自千秋封飛廉蚩尤鏤刻  
古蠶文螺書體勢雄文詞渾噩點畫缺口箝欲讀嗟無從古人  
銘勲告宗廟旂常圭卣同褒崇南中世惠辨名字髣髴猶記平  
徐戎銘有司徒南中字古仲作中  
竹垞朱氏定以爲周時器元衣琬戟大錫命偉哉共武  
匡王功岐陽石鼓未泯滅此鼎直與爭光隆彼頌君功此臣績  
中興事業高衡嵩先王盛烈足不朽豈獨古器珍昆銅傳聞分  
宜昔柄政強肆豪奪歸鈴峯神物那受權貴汚多藏適足貽災

凶流傳數姓不敢受空教位置祇涓宮鐘魚禪版伴法侶差勝  
藝玩藏房櫳風雷晝靜魍魎伏空山夜夜騰長虹天畱奇物鎮  
江海此山與鼎俱無窮寄語山靈好呵護無使六丁攝取歸清  
穹

弁山黃龍洞歌

五湖之間多名山峯巒岵嶸藏神姦何來癡龍穴山腹怒飛遂  
使蒼崖穿孤嶂屢屢五千仞深潭乃在青峰巔梯空盤盤行不  
極前踵後頂相躋攀神井垂垂湧雲蓋陰崖漈漈飛寒泉洞旁  
危石聳劍戟似阻人迹窺幽元熊羆蹲伏猛虎立幾時幻化當  
荒巒崕岈一徑見石戶舉足欲進心難前藤刺鉤衣薜花滑失  
勢恐墮千重淵青冥洞視不見底耳畔惟覺風雷喧人言下通  
諸福地武夷林屋堪往還奇聞荒怪不可述開闢應溯鴻濛年

或云媧皇昔鍊石鑿取天柱修蒼天山髓一裂不復合神物乃  
得棲蜿蜒又云大禹平水土靈威古穴探奇編剡斲山骨通地  
脈震澤始免狂濤翻崎嶇或經五丁闢幽怪疑自夸娥遷洪爐  
鼓鞀搆靈境杳冥誰得知其端噴雲泄霧會有以良坎一氣相  
周旋遠接靈湫萬峰聳近連天目雙池圓但愁窟宅一朝改風  
濤震盪山傾顛石堂偶坐一憩息談笑直恐驚龍眠急尋歸路  
下絕壁森森綠樹啼清猿

### 飛來峰

錢塘八月秋山紅有客招我游靈峯飛雲忽然當面起突兀直  
上撐青空細觀松石儼不動始悟山勢堆龍嵒斷崖萬仞不著  
地九天倒挂青芙蓉天梯石梁互鉤帶洞壑面面穿玲瓏乍驚  
墮石欲壓頂旋見峭壁森當胸螺旋而上出復入蛇行以進西



仍東霞穿日漏恍萬狀虛谷習習來陰風仰觀古木皆百丈瑤  
林玉樹紛蔥蘢蒼山無土石無罅未解造化何由融心驚目眩  
魂恟恍此身疑在迦維宮迷離始識非想天恍忽莫証無言宗  
尙疑所見皆幻相頃刻變化隨飛龍石間古佛長不語壁間多刻佛像  
誰契慧旨開愚蒙歸棲山寺縱冥索僧壁忽撞闌黎鐘

題太真上馬圖

春風別殿芙蓉美花萼樓高冷如水毬場不御玉花驄驪山馳  
道香塵起曉日西清仙仗開黃門飛鞚下蓬萊翠鈿柳葉春顰  
淺金勒桃花雪汗回海棠睡起心情倦怯倚銀鞍尙回盼須臾  
扶上侍兒肩誰道身輕不如燕五家姊妹盡承恩雕輪錦帳如  
雲屯蘭津隊合千花亂繡谷風回一笑喧宮中游幸初無極誰  
知鐵騎來河北香魂零落馬嵬坡玉鐙珠鞭行不得杜陵遺老

最悲酸曾見霓旌出上關江頭草合金輿路萬里青驄蜀道難

和人詠竹

檀欒素影自清修玉骨珊珊未許儔暑簟晝侵蒼雪冷曉窗晴  
映綠雲稠敲來梁苑三更月寫盡湘江一片秋我得結茅臨渭  
曲不將千畝易封侯

誰種瑤臺玉萬竿孤根祇合傍巖巒元卿寂寞惟荒徑庾信平  
生自小園日暮伴人真太瘦歲寒憶爾最平安東山廬下曾還  
往記得雲泉杖策看

夜渡鶯脰湖

平湖夜靜櫓聲閒一路蘆花葦葉間重露滴船涼勝雨暝雲壓  
岸遠疑山林深鷺埃亭亭出湖落漁燈渺渺還太息游蹤何日  
定鄉關小住且開顏

茗溪道中

煙靜廣川平，寒流百里程。  
水光吞月小，霜氣逼星明。  
浦樹參差影，吳歌斷續聲。  
騷人正無寐，淒絕此宵征。

冬夜

遙夜鐘聲歇，上方廣庭寒。  
色轉蒼蒼驚鳥起，樹月如水獨雁叫。  
雲天欲霜香壓梅窗，知歲晚冰生蓮漏。  
覺更長良宵，仰屋成何事。  
鑿徧東鄰破壁光。

行路難爲沈子

昌培作

行路難，不難於蜀山之巔。  
太行脊書生胸臆，逞不得男兒老大。  
猶饑寒清貧兩世守，一官魚生飮金塵。  
生氈撐腸文字五千卷，當食不足充朝餐。  
公車府中挂名字，反令奔走勞征鞍。  
躬耕無田出無馬，天涯長鋏將誰彈。  
沈侯沈侯爾莫悲，且歎爾旣不能。

曳裾上侯門飽杯炙爾又不能持籌入都市驅肥堅法當憔悴  
茅屋底捉衿決踵無人憐仕途天梯不可攀五陵車蓋徒喧聞  
縱復青松之交白水侶翟門雀散皆雲煙勸君忼慨休煩冤窮  
途慟哭何爲然相如賣賦四壁懸先生待詔雙履穿東方九尺  
之軀不博一囊粟子雲寂寞南山邊古來傑士未有不如此願  
君勿羨青銅錢長咨嗟行路難

煙雨樓四絕句

朱闌面面繞菰蒲銀闕三山境有無湖月林風都占卻底須潑  
墨寫模糊

吳波不動越天長荷嫩菱洲望渺茫莫倚闌干吹玉笛驚他三  
十六鷺鷥

明鏡光中碧四圍疎林極浦見漁磯青霄一點盤空影知是誰

家放鶴歸

百步橋南夕照明落帆亭外晚潮生空江日暮蘋風起吹斷吳船水調聲

奉贈沈觀察

啓震丈

喬松無屈盤蒼筠有孤挺蔚然歲寒姿特立謝凡穎我公梁棟器早歲風骨整貢爲天府珍清廟薦圭琤樞庭典外制下筆輕說頌遂邀上相知點檄借薇省奇才遇事見霜鶻秋逾猛幾紙愈風文鄒齊豁妖眚從此簡

帝心勲猷日彪炳西曹丹筆司東國憲節秉濟河維兗州漕路達吳郢蕩析感斯民田廬穴蛙黽公也殫丹誠胼胝先萬井宣房竹箭塞谷口波濤靖海陵百萬粟雲帆得無梗功高節愈厲私室絕造請惟時先大夫臬府霜威迴芝蘭接素心冰蘂矢衾

影中流兩砥柱衆醉偏獨醒至今誦清標秋水照耿耿公實濟  
世才僂指踐台鼎江河資作楫蒼生久引領豈識賢達人止足  
戒馳騁偶然霜露嬰遽返吳江艇東山採杞菊南湖腰笭簪脫  
冠臥林壑此樂洵難並回首傷吾翁騎鯨隔雲溟不然成二老  
共煮故山茗念此情鬱陶涕泗每交併惟公懷舊心不棄葛衣  
冷絲蘿締近歡脫畧忘夷等公女許字家大兄幼子紀羣交兩世風義薄  
夫憬賤子屬飄蓬麻溪拏舴艋披霧見彥輔後學亦何幸清酒  
爲我酤芳肴爲我飪溫語若春風四座寒威屏卻顧驚鈍軀身  
世等畫餅刻楮徒自矜抱璞誰見省何常終從公芒鞋踏煙嶺  
斗山典型在望望江路永感激成長謠后詞愧清警

上元夜翫月作

金波灩灩欲生潮桂魄團圓樂第一宵九闕寒光飛雪練六街人

影踏瓊瑤花明珠箔燈初上夢入冰壺酒易消爲問碧虛何處  
所半空笙鶴彩雲飄

新年口占

飲罷屠蘇歲又增空齋還伴短檠梅花破凍剛吹雪蘭葉翻  
風已泮冰鼎鼎百年真過鳥冥冥萬里未騫鵬此身自笑蕭閒  
甚夢繞西山月挂藤

簾鉤四首

珠箔光搖繡戶閒曲瓊懸處正當關玳筵酒煖珊瑚挂綺閣香  
消翡翠攀十里揚州花半捲一重吳苑月初彎紅闥寂寞方愁  
絕手綰蝦鬚待燕還

消息瓊幃阻蹇修銀環一寸總關愁擡將秋水堆珠網

湘簾欲捲擡秋

水唐無釣起春情滿畫樓藉爾句畱容著眼爲誰凝望未回頭

名氏句

章江江上憑高眺  
絡索聲中暮雨收

依約妝臺好見尋  
錦絨搖漾畫屏深  
風迴聽戛玲瓏玉  
月射同明了鳥金  
影落方池魚定怯  
閒敲書檻鷺初沈  
虛窗正展瑤牋碧  
新樣憑將蠶尾臨

只合垂垂傍綺寮  
芙蓉閣暖鎖春宵  
探來可許藏紅袖  
行去生憎礙翠翹  
漢殿人披金屋曙  
隋宮夢斷彩樓遙  
麟臺約處重臺曉  
青鳥書回子細邀

春日泛舟橫塘

琉璃波滑淨涵蘋  
畫舫沿洄畫板新  
十里桃花林外鳥  
一堤芳草水邊人  
春風和似揮紈扇  
斜日烘宜岸葛巾  
欲撥湘弦吟古曲  
綠蛾青鬢總成塵

毘山舟中



寒雲渺渺樹層層  
岸風來野色澄閒  
殺罟師舟一葉浪  
花如雪放魚鷹

姑蘇口號

闔閭舊業故依然  
風物江城勝事偏  
遠岫晴開行藥徑  
小闌春盎養花天  
珠簾畫舫橋三百  
翠管紅樓酒十千  
我獨閒吟懷甫里  
五湖穩放散人船

呈錢竹汀少詹

長離耿炎霄威鳳棲高梧爲儀賁  
五色振彩輝天衢我公嚴徐侶  
早值承明廬石渠探祕簡青宮  
總羣儒炳炳何煌煌英辭儷瓊  
琚明堂清廟作用以襄

皇謨偉哉華國才來者誰能踰

明哲貴遺榮達人戒止足自憶季鷹尊  
遂采淵明菊膠城佳麗

地窈窕富林谷綠渚任浮鷗青皋或驅犢蕭然雲水外焉用慕  
華轂回首長安塵冠蓋競馳逐茅屋話金鑾此樂先生獨  
經訓道義海百籍紛包含匡劉旣不作與旨誰爲探先生勤嗜  
古矻矻性所耽摹畫周孔心支拄楊墨談餘事爲網羅金薤搜  
琅函偶然灑翰墨足使斯邕慙豈獨擅詞章隻字珍三練  
稽古重儒術絳帳隆師資鹿洞及鷺湖前賢懋遺規三吳絃誦  
藪風教視轉移所惜虛車崇能使實行衰自公敷化雨陶冶皆  
英奇鄭公北海濱卜子西河湄千秋鄒魯傳斯文乃在茲  
昔者先君子早歲振雲翮同時鵷鷺侶一一鵬鵬擊荏苒四十  
年雙丸幾盈昃舊雨復何人晨星燦空碧先生獨健在歲晚餘  
蒼柏金石素情敦斗山崇望式通門愧凡器牀下拜新息

杜鵑花和韻

棟花風後麥秋天萬朶綳苞趁曉鮮望帝愁魂工幻化東皇餘  
豔付嬋娟三春寶殿紅毡展二等金缸火齊然紫藥將闌榴未  
放讓他旖旎畫欄前

暖房故事記春宵合種昭陽伴阿嬌丹頰痕深妝未卸朱顏暈  
重酒難消羅巾滿貯靈芸淚玉翦輕裁侍女綃一自鶴林神去  
後紅裳誰復覩仙標

鴝鵒聲中花事稀一枝聊與絆芳暉繁英此後春誰主碧草年  
時客未歸寒食清明香徧野商山秦嶺錦成圍蕭齋待爾添幽  
豔莫遣深紅故故飛

臨安詠古

甌閩左控右通吳瀛海東南此奧區白塔紅亭山水窟黃旗紫  
蓋帝王都江湖萬古流塵劫花柳三春入畫圖最是前賢遺澤

永兩堤六井未荒蕪

浙江

誰倒銀潢注地迴怒濤終古越山隈神功尙想黃龍渡霸氣空  
驚白馬來雲樹不分胥母口風帆直下子陵臺樟亭回首增蕭  
瑟萬弩雄姿安在哉

店疾排悶

百病隨所嬰惟瘡患實酷支離牀蓐間輾轉異寒煖晨興繭可  
襲亭午冰欲握淒風戰齒牙熱惱鬱骨肉瓊廬無六月裸壤常  
三伏而我彈指頃異境徧馳逐來如潮有信去若雲解駁勢驟  
風雨橫機幻鬼神速形神困掀簸血脈訝淫濯傳聞不才子乃  
是高陽族投荒志未悛復此肆厲毒生慙壯夫稟忽召一鬼辱  
桓公像未寫杜老句難續何術懾游魂萬里歸度朔更闢方就

枕恍忽若有瞞夢見一丈夫睢盱行詰曲莞然笑謂余病理君  
未燭人生天地內膏火自薰煇奔營忘冬夏歡宴廢昏旭高堂  
寒熱媒甘食鳩菹蓄六淫旣外煽五欲復內剝所以一身中陰  
陽互凌觸况今迫科詔矢志在榮祿得意寒灰燃失路春叢禿  
熱腸與冷念往復劇轉轂子胡不自咎勝敗祛六鑿心旌苟無  
擾衆沴安敢瀆察毫不見睫無乃自踳跼言已再拜辭令我慙  
且慙身今實有之內顧苦迷瞶眩幸見戒敢冀无妄福明當  
謝和扁不用延巫祝默坐斷諸緣清涼生耳目

紹興石經

蜀鵲夜叫津橋月千秋汴水繁華歇太清樓圯玉軸灰一夜奎  
光照吳越光堯天子睿聖姿藝事深宮誇獨絕手詔人閒重恤  
刑御屏殿內書無逸更憑翰墨表遺經八十七碑森寶札鴻都

三體久茫昧筆力鑪錘起前哲淹中孔壁審篇章漆簡蟲書羅  
卷帙九經得七本非全鄭重塵編光御筆當時珍貴世莫比傑  
閣高度球圖匹天章雲漢煥膠庠縹組青袍競填咽豈知白雁  
忽南飛槐市還爲戎馬窟剖擊雖免壘塔禍零落終同曰窠缺  
石鼓第十鼓平面鑿大孔卽昌黎所謂  
曰科也見御題曰窠石鼓詩跋賢哉吳宋兩直指先後

摩挲歸石室深簷大廈蓋覆牢從此不愁風雨裂竭來訪古獨  
躊躇六百餘年飛電瞥卻念東京全盛時儒術昌明海宇一開  
成百卷拓全碑太學兩體樹新碣煌煌盛典足不朽安用遺文  
勤補綴一從中原貔虎亂荆棘銅駝嘆倉卒廟廊至寶鼎呂珍  
空向市闌尋礎礧流傳幸爾獨未刳翠版銀鉤猶故物鳳毛虬  
甲不世見俯仰滄桑餘激烈方今

聖世慶同文璧沼周環貞石列麟書虹玉光照耀萬古岐陽石

壽埒偏安遺跡安足言願詠

皇規燦雲日

泛舟城南

秋盡寒原落木稀輕帆溶漾信斜暉已無荷蓋擎前浦尙有菱  
絲罨釣磯白水欲呼鷗共語碧雲時與雁俱飛城南便是煙波  
窟魚鳥心情肯暫違

送直夫兄輓車歸里哭賦三首

浮雲蔽重岑朔風凍寒澤泣盡不成聲輜車臨廣陌與君爲兄  
弟蛩駘理無隔梨栗少嬉娛丹黃共几席自君疢疾嬰歡笑頗  
闕寂誰謂竟摧頽青山委遺魄昔爲同根花今作孤去翮一聽  
薤露歌中腸萬慮積

有生孰無盡霜葉日夜凋悲君方盛年蜉蝣不崇朝青閨慟接

影孤燈暗長宵身無一壠遺何以禦漂搖諸雛牽我衣爛漫玉  
雪嬌未識君存亡索耶爭號咷揮涕不能語舍之卽征橈慘淡  
青楓林羈魂不可招

今古貉一邱歲月駒四足弁陽接金井名山真宅枕寒麓堂封古  
有禮士葬三月速傷哉力未逮塗碑尙緣俗東岡有魏隴先子  
泉窆卜魂去倘相依先余慰我藝松泉水嗚咽巖氣下塲驢回  
首一悲辛馬鬣何時築

題朱蔬坪太史品茶圖

玉川桑苧不復生塲釺瓦銚誰知名雪花雨腳春露英著錄始  
自蔡興丁春風入簾春晝清石鼎初作蒼蠅鳴活火緩火恣品  
評一水兩水爭輸贏蒲團曲几書傳橫颺颺度盡松風聲一甌  
當案花乳輕攬衣我欲游方瀛先生昔年侍承明挾天鴻藻世



所驚頭綱八餅分紫庭渴飲豈待思金莖一朝辭榮謝院鈴蒼  
山碧澗隨經行顧渚水綠官焙馨金沙泉味如中冷籠頭紗帽  
手自烹眠雲跂石真忘形朱門擾擾梁肉腥有味誰復識渭涇  
羨公超然斷世營我亦人間號獨醒十年渴夢江湖縈安得從  
公棲林扃月圓一片百慮冥不願腰眼圍萬釘

送家仲兄之官福建

兄以大挑知縣  
籤發福建試用

十載馳驅蜀道難新除墨綬換儒冠莫從省署看流輩要信詩  
書在此官襦袴有謠庭訓遠荆管不棄

主恩寬折腰強項何須較撫字先教德意殫

王程星急走輕郵故里纔爲信宿畱白馬潮迴巖瀨晚綠榕陰  
合劍山秋清霜彫後榮嘉樹驚浪平時任去舟珍重臨歧無別  
語鬱林片石是貽謀

謁岳鄂王墓作

和議書成宋帝封小朝廷穩占江東黃龍未抵公休恨畱得冰  
天住兩宮  
金牌十二使如雲遂事難言將在軍若使當年真逆命屬鏤先  
已賜吳員

秋日東莊雜詩二十首

鱖鮮溪畔卽滄洲處處鳴榔繫釣舟幾日西風吹落木蛤蜊菰  
葉下塘秋

負郭人家薜荔門門前流水曲通村昨宵雨過添新漲沒到鄰  
家楓樹根

枳籬屈曲小園通誰築東臬半畝宮石竹花青金鳳紫映成著  
色畫屏風

朝來霽色倍澄鮮一幅霜林小景懸  
渺渺平川寒霧斂碧禾紅穗媚涼天

雨後香塍熟玉粒連村盡歇桔槔聲  
今年八月風潮少只怕重陽半日晴

秋色應歸老圃家芳田一稜足生涯  
綠葵白薤霜風裏不是人間頃刻花

招提相對做松扉竹影櫺櫺野徑微  
白石橋邊黃葉路晚鐘聲裏一僧歸

參差樓閣萬家環林缺分明露遠山  
一霎前邨煙雨暗紅亭青嶂有無間

隔岸家家水榭多畫帆影向曉窗過  
清溪十里明於鏡一帶紅闌漾碧波

蘆荻蕭蕭淺水隈，隔溪時送雨聲來。  
棹回

匠門東去野煙荒，神劍三千已隱銑。  
日暮豆花棚下過，有人沽

酒說干將

地近匠門

當年詩老擅清詞，南國春風寫折枝。  
芳樹又隨塵劫盡，君來何

處寄相思

惠紅豆故居今已燕沒

朝真高閣鬱嵒嵒，此地由來接絳霄。  
金簡綠章初奏罷，似聞空

外駐雲輶

文星閣在莊北高出雲表

林端古剎隔雲窗，寶相輪空湧法幢。  
偶過秋原回首望，認成螺

髻影雙雙

雙塔寺在莊西

彩舫競指白公隄，歸到橫塘烏欲棲。  
一闕洞簫聲未徹，月華已

渡女牆西

胥江江水繞城隅千里雲帆轉舳舻夜半扣舷歌欸乃喚回清  
夢落三湖

松陵官路接吳興小市魚蝦渡口燈侵曉販鮮船到岸津頭先  
聽鼓登登

百尺高酣舊有亭年年叢桂吐幽馨賜莊花石今無主贏得人

呼御史廳

余所居爲前  
明顧氏別業

寂寥惟有子雲居老屋青鐙畫不如濁酒一尊書萬卷滿階梧  
葉月明初

滄浪亭子百花潭未及幽居此地堪記取秋光奇絕處斷雲疎  
樹蒔田南

白鶴山房詩鈔卷二終